

Powšitkowne WOZJEWJENJA

njedźelu, 27. apryla 2025 – Božeje miłosće

Duchowna hudźba ze serbskimi twórby

K zakónčenju jutrowneho tydźenja wotměje so w Budyskej tachantskej cyrkwi swjateho Pětra tutu njedźelu, 27. apryla, w rjedže nyšporow duchowneje hudźby piščelowy wječor. Hóštny organist Stephan Kiessling hraje twórby serbskich komponistow. Započatk je we 18.00 hodź. Wšitcy zajimcy su wutrobnje přeprošeni.

Wopominanje na padłych pólskich wojakow

Na kónc Druheje swětoweje wójny a swojich padłych krajanow chce něhdže 200 Polakow póndźelu, 28. apryla, w Chrósćicach spominać. K tomu su tež Serbja a Němcy z Łužicy přeprošeni. Spominansku swjatočnosť zahaja w 9.30 hodź. z pólskorěčneje Božej mšu w Chrósćanskej cyrkwi, kotruž budže farar Gerat Warnar sobu swjećić. Dorostowy chór Budyskeho Serbskeho gymnazija kemše wobrubu. Tón a chór Chrósćanskeje zakładneje šule budžetaj tež na spominanju při pomniku za padłych pólskich wojakow spěwać, kotraž so w 11.00 hodź. zahaji. Pólski historikar porěči tón džen w 15.00 hodź. w Hórkach při pomniku srjedź wsy k stawizniskim pozadkam.

Požohnowanje motorskich

Popołdno z požohnowanjom motorskich zahaji so njedźelu, 4. meje, w 14.00 hodź. z nyšporom w Ralbičanskej cyrkwi. Přizamknje so zhromadny wulět.

Mejski nyšpor TCM

Towarstwo Cyrila a Metoda z.t. (TCM) přeprošuje na mejski nyšpor, kotryž budže njedźelu, 4. meje, w 17.00 hodź. w Róžeńčanskej swjatnicy. Wšitcy su wutrobnje witani.

Wohnjowi wobornicy do Różanta

Džakna Boža mša wohnjowych wobornikow ze Zarjadniskeho zwjazka „Při Klósterskej wodze“ kaž tež susodnych woborow na česć swjateho Floriana budže pjatk, 9. meje, w 19.00 hodź. w hnadownej cyrkwi w Róžeńće. Wšitcy wobornicy kaž tež hosćo su přeprošeni.

Putnikowanje staršich a chorych ludźi do Różanta

Putnikowanje staršich a chorych ludźi ze serbskich wosadow do Różanta budže sobotu, 10. meje. Boža mša zahaji so w 14.00 hodź. Na njej wudžela tym, kotřiž sej to přeja, žałbowanje chorych. Wot 13.30 hodź. modla so tam swjaty różowc.

Putnikowanje do Hejnic

Wěriwi z Němskeje, Pólskeje a Českeje su sobotu, 11. meje, na putnikowanje wujednanja do českich Hejnic přeprošeni, wuraznje tež Serbja. Na putnikowanju spominaja wosebje na kónc Druheje swětoweje wójny před 80 lěty. Boža mša w hnadownej cyrkwi zahaji so w 10.30 hodź. Hłowny celebrant budže monsignore Adolf Pintíř, kapłan wulkopriorata rýčerskeho rjadu maltezam.

Kapałnicy w Ralbicach

Drježdžanski hólci chór kapałnikow wuhotuje njedźelu, 11. meje, w 14.00 hodź. nyšpor w Ralbičanskej cyrkwi. Wšitcy su k tomu wutrobnje přeprošeni. Na kóncu budže zběrka za kapałnikow.

Prózdnińska jězba za 5. do 8. lětnik

Dekanatne dušepastyrstwo za dźěći a młodžinu we Worklecach přeprošuje šulerki a šulerjow nětčišich 5. do 8. lětnikow w lěčnych prózdninach na jězbu do Zehrena blisko Mišna. Wona wotměje so wot póndžele do pjatka, 21. do 25. julija. Swójski přinošk na wobdžělnika wučinja 115 eurow. Přizjewjenja přijimuju so hač do njedžele, 18. meje, online. Link na wotpowědnu stronu je pod www.posol.de wozjewjeny.

Serbska putniska jězba

Na serbsku putnisku jězbu do Weserskich horin wot póndžele do štwórtka, 14. do 17. julija, přeprošuje Radworske Šmitec-Schwarzec busowe wozydłownistwo. Duchowny nawod změje farar Gabriš Nawka. Přizjewjenja přijimuju w Radworju, telefonowe čisło (03 59 35) 28 60.

Prewentiwne kubłanje na polu wotwobaranja seksualizowaneje namocy

Wotwobarać seksualizowanu namóc je wažny wobstatk džěła z dźěćimi a młodžinu we wosadach. Zaměr je, nowu kulturu wzajemneje zhromadnosće wuwijać. Za to su prewentiwne struktury a procesy trěbne. Worklečanske dekanatne dušepastyrstwo za dźěći a młodžinu poskičuje k tutej temje kubłani po póndželomaj 19. meje na Ralbičanskim „Radlubinje“ a 2. junija we Worklečanskim Don Boskowym domje, stajnje wot 18.00 do 21.00 hodź. Wšitcy pomocnicy na nabožnych prózdninskih dnjach we wosadach, ale tež dalši čestnohamtscy, kotřiž maja tam zwisk z dźěćimi a młodostnymi, na přikład w sakristiji abo ze šolu, su na jedne ze zarjadowanjow wutrobnje přeprošeni. Ličba městnow je wobmjezowana. Přizjewjenja přijimuju so jenož online. Link k tomu kaž tež k dalšim wažnym informacijam je pod www.posol.de wozjewjeny.

Sabina Lanzyna, referentka za pastoralku dźěći